

# KIA ACTIVO RIBA E BON CAMINDA

STA. CRUZ -- Un maneho nobo, cu lo contene un programa amplio y intensivo conhunto cu organizacion- y comerciantenan lo cuminsa wordo implementa e aña aki mes. E plan di resocializacion nobo aki mester wordo acorda door di Minister di Husticia prome. Asina mes KIA a cuminsa experimenta cu diferente programa piloto pa asina waak con esaki ta bay den KIA y den comunidad. Esaki tur a resulta hopi positivo. Mas cu claro lo trata tambe pa elimina e obstaculonan grandi cu pa hopi aña a domina e instituto coreccional y pesey no por a funciona como tal. Staff di KIA, bao guia di sra. Oduber, sra. Agunbero y Mayoor Grovell y cu personal y diferente persona conocir y ehemplar den nos comunidad a cera cabez y a cuminsa haci e prome preparacionnan pa introduci un otro programa structural cu KIA lo kier implementa pa e re- integro di preso den comunidad Arubano. Ta trata di programanan inovativo unda hendenan conoci den comunidad ta traha directo hunto cu e presonan y pa trece producto- y mensahenan relevante den comunidad na un manera creativo y educativo y tambe digitaliza. Publicacion KIA 2013 bao guia di e conocido autora sra. Liliana Braamskamp – Erasmus cu tayer di skirbimento presonan lo saca nan prome publicacion, cu lo wordo presenta den forma di un coleccion di storia. Por medio di e tayer Skirbimento Creativo presonan lo descubri y desaroya nan habilidad pa explora nan imaginacion, expresa nan creatividad cu palabra y comparti nan storianan. Esaki lo mehora nan capacidad pa skirbi y lesa, encurasha e pensamiento positivo, creativo y fortalece nan auto- estima. Durante e tayer aki, sra. Braamskamp-Erasmus lo siña presonan desaroya un bos personal unico, inspira completamente pa nan propio experencianan, sentimento y imaginacion. Tambe nan lo experimenta cu diferente forma di skirbimento y descubri e posibilidadnan infinito di literatura. KIA lo traha un blog unda e proceso di skirbimento ta wordo actualiza pa asina comunidad por sigui e proceso di e participantenan cu ta desea di muestra comunidad e esfuerzo cu nan ta haciendo pa sali mas prepara pa sirbi Aruba na un manera positivo. Habriendo caminda pa e grupo aki awe, lo facilita nan re- integracion mañan. Cada cursista ta scoge un formato, p.e. un articulo, carta, novela cortico pa traha su tarea final pa asina KIA por amplia e obranan y saca su prome publicacion 2013 pa presenta na e comunidad di Aruba. Sra. Oduber, miembro di managementteam di KIA, ta sumamente entusiasmo cu e tayer aki. "Den combersacion cu sra. Braamskamp-Erasmus riba e tayer ma sinti manera mi mes tabata un cursista. E manera di su splicacion a ponemi wak cosnan di diferente perspectiva y for di diferente personahe. Y di berdad, drentando diferente personahe ta pone e sentimentonan manera alegria, tristesa, decepcion of soñonan wordo mira di diferente manera. Via personahe por trata e sentimentonan na un forma positivo cu e perspectiva pa bai dilanti. Mi ta hopi sigur cu lo tin un wachtlíst liher den KIA, pasobra presonan tin un inmenso hamber na educacion. Como instituto coreccional nos lo haci tur lo posibel pa implementa e tayer educativo aki pa full KIA. Nos ta cuminsa pronto cu e prome grupo ", sra. Oduber a

declara. Sra. Braamskamp-Erasmus ta splica kico a hibe na e tayer aki: "Na momento cu sra. Oduber a acercami pa waak si mi tin interes den un proyecto di skirbimento pa presonan di KIA, mi tabata sa caba cu esaki lo bira un reto cu mi lo kier asumi. Den pasado mi a yega di facilita diferente tayer pa adulto y tambe pa mucha, hasta mucha cu ainda no a siña lesa ni skirbi na school. Asina mi a bin descubri cu no mester tin limitacion ora ta trata di expresa e imaginacion por medio di palabra (of cualkier otro medio), e rekisito mas importante ta entusiasmo, determinacion y fantasia. Esun cu kier di berdad ta logra. Pa mi semper e ta un proceso fascinante pa por comparti mi conocimiento y siña di otro pa asina mi por crece como autor y como ser humano". Sra. Braamskamp - Erasmus a wordo di acerca den pasado pa ex - presonan di KIA y ta bisa lo siguiente riba esaki: "Mi a yega di ricibi un tip for di un persona cu tabata den KIA, cu a concientizami riba e hecho cu tin preso cu e necesidad pa conta nan storia, pa laga algo atras pa nan yiunan y famia, pero na e momento ey mi no tabata tin e base ni experiencia ainda pa por a ehecuta un tayer di skirbimento, ya cu mi mes tabata explorando mi habilidadnan como autor. Y keto bay, ya cu mi no ta kere cu mi lo stop di siña ni crece nunca, y esey ta algo cu mi lo desea di comparti cu ken cu ta interesa pa haya sa mas di su posibilidadnan den bida. Nos tur mester tin e derecho pa desaroya nos mes". Concierto contra criminalidad. Bao guia di nos famoso bewaker, Jairo Evertsz, mihor conoci como Buchi Cunucu, ya caba a haci e prome paso pa un concierto contra criminalidad. E idea ta pa tin un concierto canta y toca door di e presonan mes unda comunidad lo por bin aprecia y scucha e mensahenan clave cu e preso kier manda pa muchanan, hoben y comunidad henter. Tambe lo tin un scena unda por mira dicon crimen ta wordo cometi, pa esaki e conocido yiu di Corsou, Quincy Comenencia, cu tin hopi experiencia den musical y tambe ta parti di e banda Cache Royal lo guia y prepara e presonan den esaki. Sr. Comencia ta expresa: "Semper tur loke m'a haci, m'a link cu musica, y ta keda kere cu te mihor remedi pa soluciona tur cos". KIA ta gradici nos hermana isla Corsou cu ta uni cu Aruba y dunando apoyo. Semper ta bon pa yuda otro cu nos experencianan pa nos hiba Caribe padilanti. KIA a haci dos presentacion caba, e prome biaha tabata na December. Unda cu e director di Power FM, sr. Ruben Garcia, tabata maestro di ceremonia y a transmiti live e programa musical di presonan. Pa himno y bandera a forma mas grupo di presonan cu a haci un homenahe na nos tata di cultura, sr. Padu Lampe. Presonan mes a skirbi, toca y canta e canticnan. Hopi di nan, no tabata tin experiencia den esaki, cu nan motivacion y interes pa purba saca lo mehor di nan, a resulta den algo sumamente bonita. Den ambos biaha, comunidad tabata conmovi di scucha di e presonan mes saca nan voz, sa ta kico a hibanan eynan y con nan ta gritando pa nan segundo chens. Hopi yamada a wordo ricibi na e emisoranan for di comunidad. Cambianan ta wordo mira den e presonan aki den KIA. Nan comportacion, nan animo, nan determinacion pa un mihor futuro ta bisto. Y ainda tin hopi mas preso cu KIA kier facilita. No ta facil, cu un personal so, y asina profesional riba musico pa yuda y guia tur. Pero for di comunidad musiconan a cuminsa duna KIA un aporte grandi y ta mustrand tambe cu nan tambe ta kere cu tur hende por coregi su mes y tuma un rumbo nobo y positivo den bida. Fo'i aña pasa November caba diferente personahe den e mundo di musico a drenta KIA y hunto cu



Jairo Evertsz a guia e presonan den nan musica. Ta trata aki di Chayo Tromp, Dimitri Frans, Fiyo Wester y Janiro Eisdén. Esaki a facilita KIA pa trece nan prome cd cu ta yama KIA Production y ta riba youtube pa tur hende por scucha e mensahe di nos (ex)presonan cu kier contrabui sano na Aruba. Awor, e conocido Biggy Boy ya caba ta trahando cu e presonan den KIA. Biggy Boy a haya un contrato pa bay Miami y kier haci algo unico y ehemplar pa Aruba. Ya a cuminsa prepara cu Jairo Evertsz e cancionnan nobo hunto cu e presonan. Elite empire by Krish ta yudando KIA cu e ekipo y sponso r e cd tambe. Esaki ta algo unico pa KIA y pa Aruba. Aruba sigur lo ta di e forma aki un ehempel pa e islanan rond di nos. E idea tras di e concierto di criminalidad ta pa haci'e den un lugar apto pafor di KIA, pa asina comunidad por bin waak y scucha e cancion cu presonan tin pa presenta. Tambe pa scucha e palabranan dedica na presonan den KIA y personan afor di KIA. KIA lo cuminsa tin e idea pa cuminsa cerca di cas, esey kier meen haci un concierto pafo di KIA unda un publico selecta, famia- y conocirnan, por bin goza di e concierto. Den futuro KIA kier ampli'e cu e meta y focus cu integracion ta cu comunidad y no di un banda so. Sr. Ruben Garcia a confirma caba cu e lo ta e maestro di ceremonia y KIA por conta 100% riba sr. Garcia, KIA ta masha contento cu e respaldo aki. Mas cu claro semper KIA mester haya permiso di Ministerio Publico prome cu un preso por sali for di KIA. Tin hopi requisito pa esaki tuma lugar y esey semper ta bon pa mantene e seguridad y ordo den KIA y den comunidad. Tambe mester bay sinta cu tur organizacion concerni pa waak con hunto por garantiza e maximo seguridad pa tur hende pa tin un concierto asina. Bao di permiso ya caba presonan sa di sali haci trabao pafor di KIA. Y awor esaki tin un otro meta. Durante e concierto aki, lo demostra diferente tipo di productonan cu presonan ta haci den KIA y por tin e posibilidad di cumpranan na un bon prijs. E programan of e actividadnan di resocializacion cu ta tuma lugar pafor di KIA manera na December 2012, unda e presonan a decora bureau di Minister Dowers cu decoracion recicla pa pasco no por tuma lugar sin beveligers. Pesey tambe KIA ta contento cu e grupo hoben nobo cu caba nan curso intensivo di dos aña. Nan ta un grupo hopi entusiasmo, motiva, y semper cla pa yuda. Un di e graduadonan cu puntonan cu a sobresali y ta funciona tremendo na KIA ta Zahira van de Linde. Van de Linde ta expresa cu for di cuminsamento caba e tabata entusiasmo pa su reto nobo riba su carrera profesional. Dunando orden, disciplina y respet y teniendo na cuenta e aspecto humano, semper ta trece bon comprendimento entre hende. Tur dia su meta ta pa implementa loke el'a a siña for di buki pa haci'e den practica. Y esaki por solamente sin no tin miedo pa intimidacion, represaya of cualkier otro tipo di cosnan negativo. Ora e tabata parti di diferente tipo di programa di resocializacion di e presonan, e por a experiencia kico kier meen hiba Aruba pa dilanti. Como un persona cu a caba di drenta e tereno di husticia ta orguyoso di ta parti di e diferencia cu Minister Dowers ta treciendo pa Aruba, asina Van de Linde a comenta.

